

Na osnovu člana 151. stav 5. i člana 164. tačka 4) Zakona o zaštiti od požara i vatrogastvu ("Službene novine Federacije BiH", broj 64/09), federalni ministar unutrašnjih poslova donosi

**PRAVILNIK
O SADRŽAJU I NAČINU OBAVLJANJA POSLOVA
INSPEKCIJSKOG NADZORA U OBLASTI ZAŠTITE OD
POŽARA IZ NADLEŽNOSTI FEDERALNOG
MINISTARSTVA UNUTRAŠNJIH POSLOVA -
FEDERALNOG MINISTARSTVA UNUTARNJIH
POSLOVA I KANTONALNOG MINISTARSTVA
UNUTRAŠNJIH POSLOVA**

I - OPĆE ODREDBE

Član 1.

(Predmet Pravilnika)

Ovim pravilnikom uređuju se sadržaj i način obavljanja inspeksijskog nadzora u oblasti zaštite od požara iz nadležnosti Federalnog ministarstva unutrašnjih poslova - Federalnog ministarstva unutarnjih poslova (u daljnjem tekstu: Federalno ministarstvo) i kantonalnog ministarstva unutrašnjih poslova (u daljnjem tekstu: kantonalno ministarstvo).

Član 2.

(Djelokrug inspeksijskog nadzora)

- (1) Poslovi inspeksijskog nadzora iz člana 1. ovog pravilnika obuhvataju utvrđivanje provođenja mjera zaštite od požara određenih Zakonom o zaštiti od požara i vatrogastvu ("Službene novine Federacije BiH", broj 64/09 - u daljnjem tekstu: Zakon) i planove zaštite od požara, kao i provođenje propisa o tehničkim normativima i standardima koji se odnose na zaštitu od požara, osim u pitanjima koja su stavljena u nadležnost federalne i kantonalne inspekcije koja se organizuje u okviru civilne zaštite.
- (2) Poslovi inspeksijskog nadzora iz stava (1) ovog člana su hitni te zahtijevaju da Federalno ministarstvo i kantonalno ministarstvo odmah izvrše inspeksijski nadzor u pravnim licima za koja saznaju da ne provode mjere iz stava (1) ovog člana.

Član 3.

(Organizovanje inspekcije u Federalnom ministarstvu i kantonalnom ministarstvu)

U okviru Federalnog ministarstva i kantonalnog ministarstva za obavljanje poslova inspeksijskog nadzora iz člana 2. ovog pravilnika organizuje se inspekcija za zaštitu od požara, koja obavlja poslove inspeksijskog nadzora u pravnim licima i drugim institucijama u privatnom ili državnom vlasništvu utvrđenim u čl. 150. i 151. Zakona, svako iz okvira svoje nadležnosti.

Član 4.

(Ovlaštena lica za obavljanje inspeksijskog nadzora)

Poslove inspeksijskog nadzora u oblasti zaštite od požara u pravnim licima iz člana 3. ovog pravilnika obavljaju federalni inspektori za zaštitu od požara za pitanja iz nadležnosti Federalnog ministarstva i kantonalni inspektori za zaštitu od požara za pitanja iz nadležnosti kantonalnog ministarstva.

Član 5.

(Iskaznica za inspektore)

- (1) Federalni inspektori za zaštitu od požara (u daljnjem tekstu: federalni inspektori) i kantonalni inspektori za zaštitu od požara (u daljnjem tekstu: kantonalni inspektori) imaju iskaznicu inspektora koju inspektorima izdaju:
 - 1) za federalne inspektore, iskaznicu izdaje federalni ministar unutrašnjih poslova,

- 2) za kantonalne inspektore, iskaznicu izdaje kantonalni ministar unutrašnjih poslova.

- (2) Iskaznica inspektora iz stava (1) ovog člana izrađuje se prema Pravilniku o obliku i sadržaju iskaznice inspektora organa uprave u Federaciji Bosne i Hercegovine ("Službene novine Federacije BiH", broj 15/08).
- (3) Iskaznica inspektora iz stava (2) ovog člana služi za dokazivanje službenog svojstva inspektora, identiteta inspektora i da je ovlašten za obavljanje inspeksijskog nadzora iz oblasti zaštite od požara u skladu sa Zakonom.
- (4) Inspektor je dužan nositi iskaznicu inspektora kada ide na obavljanje inspeksijskog nadzora i pokazati rukovodiocu pravnih lica iz člana 3. ovog pravilnika u kojem obavlja inspeksijski nadzor.

II - SADRŽAJ INSPEKCIJSKOG NADZORA IZ OBLASTI ZAŠTITE OD POŽARA

Član 6.

(Poslovi iz nadležnosti inspekcije za zaštitu od požara)

- (1) U skladu sa članom 150. stav 1. Zakona inspekcija za zaštitu od požara Federalnog ministarstva i kantonalnog ministarstva obavlja inspeksijski nadzor u pravnim licima iz člana 3. ovog pravilnika, svako iz okvira svoje nadležnosti, koji obuhvata sljedeća pitanja:
 - 1) imaju li organizovanu zaštitu od požara, u skladu sa Zakonom;
 - 2) provode li zaštitu od požara u svojim prostorijama, objektima, skladištima i dr.;
 - 3) jesu li objekti priključeni na niskonaponsku mrežu zaštićeni osiguračima-sklopkama-nastavljajcima;
 - 4) izvršavaju li obaveze iz plana zaštite od požara iz člana 22. stav 1. Zakona koji se na njih odnose;
 - 5) imaju li donesen opći akt kojim su uređena pitanja koja se odnose na organizaciju i funkcionisanje zaštite od požara u svojim objektima i prostorijama;
 - 6) sadrži li opći akt sva pitanja koja su navedena u članu 24. stav 1. Zakona;
 - 7) jesu li sva zaposlena lica upoznata s općim aktom;
 - 8) provodi li se stručna obuka i osposobljavanje za zaštitu od požara;
 - 9) provode li se opće mjere zaštite od požara iz člana 27. st. 1. i 2. Zakona;
 - 10) imaju li elaborat zaštite od požara koji je sastavni dio projektne dokumentacije pri projektovanju građevine u kojima se proizvode ili skladište eksplozivne materije, zapaljive tečnosti i gasovi, kao i privredne i industrijske građevine u kojima se ugrađuju postrojenja i uređaji;
 - 11) sadrži li elaborat zaštite od požara minimalne mjere utvrđene u članu 31. stav 2. Zakona;
 - 12) prilikom projektovanja i gradnje građevina i ugradnje priključaka, opreme, uređaja i postrojenja predviđaju li i imaju li mjere zaštite od požara koje omogućavaju radnje iz člana 32. stav 1. Zakona;
 - 13) imaju li protivpožarno stepenište, a koje ispunjava uvjete iz člana 33. Zakona;
 - 14) jesu li električne, ventilacione, gasne, naftovodne, toplovodne, gromobranske i druge instalacije i uređaji, kao i dimovodi, projektovani, postavljeni, odnosno izvedeni, koriste li se i održavaju prema propisima o tehničkim normativima i standardima koji se odnose na ta pitanja, kao i uputstvima proizvođača;
 - 15) obavlja li se atestiranje instalacija, uređaja, dimovoda i ložišta prema Pravilniku o utvrđivanju uslova za obavljanje periodičnih pregleda, mjerenja i ispitivanja na elektroenergetskim postrojenjima, električnim

- uredajima, električnim instalacijama i izdavanju isprava ("Službene novine Federacije BiH", br. 41/11 i 7/12);
- 16) jesu li uz glavni projekt za građevinu iz člana 31. stav 1. Zakona priloženi i stručna ocjena i mišljenje da su u tehničkoj dokumentaciji u potpunosti primijenjeni propisi, standardi i drugi normativi zaštite od požara te da su osigurane funkcionalnost i efikasnost projektom predviđenih mjera zaštite od požara;
 - 17) održavaju li se aparati za gašenje od požara i ispituju li ispravnost i funkcionalnost u skladu sa propisima o tehničkim normativima i standardima koji se odnose na ta pitanja i uputstvom proizvođača;
 - 18) upotrebljavaju li se zapaljive, eksplozivne i druge opasne materije i skladište u skladu sa propisima, tehničkim normativima i standardima za te materije i koji su sigurni za rukovaoca i okolinu;
 - 19) obavlja li se prijevoz zapaljivih, eksplozivnih i drugih opasnih materija u skladu sa propisom kojim je uređen prijevoz opasnih materija;
 - 20) obavlja li se redovno ispitivanje ispravnosti i funkcionalnosti sistema za dojavu i gašenje požara, uređaja za kontrolu i zaštitno djelovanje, uređaja za sprečavanje širenja požara, instalacija i uređaja izvedenih u protivne eksplozivnoj zaštiti prema zakonu, tehničkim propisima i uputstvom proizvođača;
 - 21) je li izvršeno osiguranje građevine od požara i eksplozije;
 - 22) je li vanjska i unutrašnja hidrantna mreža za gašenje požara ugrađena prema tehničkim normativima;
 - 23) imaju li građevine koje se koriste upotrebne dozvole iz člana 38. stav 4. Zakona;
 - 24) prodaju li se ili stavljaju u prodaju zapaljive i druge opasne materije na način propisan u članu 42. Zakona;
 - 25) provodi li se ili organizuje zaštita od požara prirodnog i kulturno-historijskog nasljeđa i da li se ažurira plan zaštite od požara iz člana 45. Zakona;
 - 26) održavaju li se u ispravnom stanju postrojenja, uređaji, električne, gasne, ventilacijske i druge instalacije, dimovodi i ložišta u skladu sa članom 50. Zakona;
 - 27) da li se prilikom stavljanja u promet postrojenja, uređaja, električnih, gasnih, ventilacijskih i drugih instalacija, dimovoda i ložišta u objektu vrši certificiranje opreme, uređaja i drugih sredstava za zaštitu od požara u skladu sa propisima i standardima iz člana 51. stav. 1. i 2. Zakona;
 - 28) provodi li se vatrogasno dežurstvo u uvjetima povećane požarne otpornosti utvrđene u članu 46. Zakona;
 - 29) osigurava li se osposobljavanje i usavršavanje svih zaposlenih u pravnim licima na način utvrđen u članu 128. st.: 1., 2., 3. i 5. Zakona;
 - 30) obavljaju li se i drugi poslovi koji se odnose na zaštitu od požara.
- (2) Federalni inspektori dužni su redovno pružati stručnu pomoć kantonalnim inspektorima u pitanjima pravilnog obavljanja inspeksijskog nadzora iz njihove nadležnosti sa ciljem da se ujednači praksa u primjeni zakona i podzakonskih propisa, kao i tehničkih normativa i standarda u oblasti zaštite od požara na području cijele Federacije.

Član 7.

(Uvid u spis predmeta)

- (1) Ako u toku obavljanja inspeksijskog nadzora u pravnim licima iz člana 3. ovog pravilnika federalni inspektor uoči

da je pravno lice od kantonalnog ministarstva dobilo odobrenje za koje ne ispunjava uvjete predviđene Zakonom ili podzakonskim propisom koji je donesen na osnovu tog zakona, u tom slučaju federalni inspektor može izvršiti uvid u spis predmeta za koji je izdato to odobrenje i naložiti odgovarajuće mjere.

- (2) Kantonalno ministarstvo i pravno lice u slučajevima iz stava (1) ovog člana dužni su u roku od 30 dana da postupe po uputama Federalnog ministarstva, o čemu pismeno izvještavaju to ministarstvo.

Član 8.

(Obavješćavanje nadležne inspekcije ili drugog organa uprave)

Ako u toku obavljanja inspeksijskog nadzora iz člana 6. ovog pravilnika federalni, odnosno kantonalni inspektor utvrdi da postoji povreda propisa iz nadležnosti druge inspekcije ili iz nadležnosti drugog organa uprave, dužan je o tome odmah, bez odlaganja, obavijestiti nadležnu inspekciju, odnosno organ uprave na koji se propis odnosi.

Član 9.

(Angažovanje stručnog lica ili pravnog lica)

- (1) Ako u toku obavljanja inspeksijskog nadzora iz člana 6. ovog pravilnika federalni, odnosno kantonalni inspektor utvrdi da postoji potreba da se izvrši dodatna stručno-tehnička ekspertiza projekta, uređaja, opreme, instalacija i dr., u tom slučaju podnosi zahtjev federalnom ministru unutrašnjih poslova, odnosno kantonalnom ministru unutrašnjih poslova za angažovanje stručnog lica ili pravnog lica ovlaštenog za izvršenje poslova koji su obuhvaćeni zahtjevom.
- (2) Troškove iz stava (1) ovog člana snosi pravno lice u kojem se vrši inspeksijski nadzor.

Član 10.

(Zajedničko planiranje inspeksijskog nadzora)

- (1) Ukoliko kod pravnog lica iz člana 3. ovog pravilnika za određene objekte, prostorije i dr. nadležnost o pitanjima provođenja mjera zaštite od požara imaju i federalna i kantonalna inspekcija, inspeksijski nadzor se planira na način da u isti dan bude obavljen i od federalne inspekcije i kantonalne inspekcije.
- (2) Planiranje inspeksijskog nadzora iz stava 1. ovog člana obavlja se na osnovu plana inspeksijskog nadzora koji sačinji federalni inspektor a koji se dostavlja kantonalnoj inspekciji na čijem području se nalaze pravna lica ili objekti koji su predmet inspeksijskog nadzora od federalne inspekcije.

III - NAČIN OBAVLJANJA IN SPEKCIJSKOG NADZORA

Član 11.

(Način obavljanja inspeksijskog nadzora)

- (1) Inspeksijski nadzor obavlja se na sljedeći način:
 - 1) provjerom u dokumentaciji da li su obuhvaćene sve mjere zaštite od požara;
 - 2) provjerom u dokumentaciji da li se provode mjere zaštite od požara;
 - 3) neposrednim opažanjem da li su mjere zaštite od požara izvedene u skladu sa važećim propisima iz oblasti zaštite od požara i tehničkim normativima i standardima utvrđenim za pojedine mjere zaštite.
- (2) Inspeksijski nadzor iz stava (1) ovog člana provodi se neposrednim uvidom u dokumentaciju (planovi zaštite od požara, pravilnici, opći akti i dr.), spise predmeta i druge akte koji se odnose na zaštitu od požara te pregledom objekata, prostorija, instalacija, uređaja, sredstava i dr. koji su namijenjeni za provođenje mjera zaštite od požara.

Član 12.

(Pokretanje inspeksijskog nadzora)

- (1) Federalni i kantonalni inspektori inspeksijski nadzor pokreću po službenoj dužnosti i vode po Zakonu o upravnom postupku ("Službene novine Federacije BiH", br. 2/98 i 48/99), a u skladu s odredbama čl. 117. do 132. Zakona o organizaciji organa uprave u Federaciji Bosne i Hercegovine ("Službene novine Federacije BiH, broj 35/05) te odredbama čl. 151. do 156. Zakona i odredbama ovog pravilnika.
- (2) Federalni i kantonalni inspektori dužni su u svim slučajevima kada postoji zahtjev za pokretanje inspeksijskog nadzora izvršiti inspeksijski nadzor prema stavu (1) ovog člana.
- (3) Inspeksijski nadzor federalni inspektor i kantonalni inspektor pokreću i po nalogu glavnog federalnog, odnosno glavnog kantonalnog inspektora.

Član 13.

(Upoznavanje pravnog lica sa početkom inspeksijskog nadzora)

- (1) Federalni i kantonalni inspektori s inspeksijskim nadzorom koji se obavlja prema članu 15. ovog pravilnika će najmanje 24 sata prije otpočinjanja inspeksijskog nadzora upoznati pravno lice o inspeksijskom nadzoru koji će obaviti u tom pravnom licu (telefonom, mobilnim telefonom, telefaksom i dr.).
- (2) Izuzetno, obavještenje iz stava (1) ovog člana neće se dostaviti ako se inspeksijski nadzor obavlja kao vanredni inspeksijski nadzor ukoliko bi se time ugrozila svrha tog nadzora.

Član 14.

(Godišnji program inspeksijskog nadzora)

- (1) Inspeksijski nadzor obavlja se prema godišnjem programu inspeksijskog nadzora koji donose:
 - 1) glavni federalni inspektor na prijedlog federalnog inspektora;
 - 2) glavni kantonalni inspektor ili rukovodilac službe u kojoj se nalazi kantonalna inspekcija na prijedlog kantonalnog inspektora;
- (2) Program iz stava (1) ovog člana sadrži: naziv pravnog lica u kojem se obavlja inspeksijski nadzor, pitanja koja će se obuhvatiti nadzorom i vrijeme obavljanja tog nadzora te druga pitanja potrebna za izvršenje nadzora.
- (3) Zavisno od vrste, obima i složenosti objekta koji je predmet inspeksijskog nadzora u programu iz stava (1) ovog člana određuje se i broj inspektora koji će obaviti taj inspeksijski nadzor.
- (4) Program sadrži i broj radnih dana u kojima se obavlja inspeksijski nadzor, s tim da broj radnih dana ne može biti manji od 1/3 ukupnih radnih dana u mjesecu.
- (5) Na osnovu programa iz stava (1) ovog člana, federalni i kantonalni inspektori sačinjavaju mjesečni plan rada prema vlastitoj procjeni.
- (6) Mjesečni plan rada iz stava (5) ovog pravilnika donosi glavni federalni inspektor na prijedlog federalnog inspektora, odnosno glavni kantonalni inspektor na prijedlog kantonalnog inspektora ili rukovodioca službe, a ako nema glavnog inspektora, u tom slučaju plan rada donosi rukovodilac organizacione jedinice u kojoj se nalazi inspektor. Plan rada sadrži, između ostalog, naziv pravnog lica u kojem se obavlja nadzor, datum izvršenja inspeksijskog nadzora, vrsta nadzora i dr.
- (7) Inspeksijski nadzor može se izvršiti i na zahtjev federalnog ministra unutrašnjih poslova, odnosno kantonalnog ministra unutrašnjih poslova.

Član 15.

(Obavljanje inspeksijskog nadzora)

- (1) Inspeksijski nadzor se obavlja kao redovan, vanredni ili ponovni/kontrolni, a po obimu potpuni ili djelomični.
- (2) Inspeksijski nadzor iz stava (1) ovog člana može biti najavljen ili nenajavljen.
- (3) Redovni inspeksijski nadzor, po pravilu, najavljuje se 30 dana prije dana predviđenog za obavljanje tog nadzora.
- (4) Redovni inspeksijski nadzor, po pravilu, obuhvata potpuni pregled svih pitanja obuhvaćenih planom rada, a vanredni ili ponovni/kontrolni nadzor obuhvata samo određena pitanja koja odrede inspektori.
- (5) Vanredni inspeksijski nadzor u smislu ovog pravilnika je svaki nadzor koji nije obuhvaćen godišnjim planom i programom iz člana 14. ovog pravilnika.
- (6) Ponovni/kontrolni inspeksijski nadzor obavlja se kod pravnih lica iz člana 3. ovog pravilnika, kod kojih je prilikom redovnog pregleda utvrđeno nezadovoljavajuće stanje u oblasti zaštite od požara pa su naložene određene mjere za otklanjanje utvrđenih nedostataka.
- (7) Ponovni/kontrolni inspeksijski nadzor se vrši, po pravilu, u roku od tri mjeseca od dana izvršenog redovnog inspeksijskog nadzora, a najkasnije u roku od šest (6) mjeseci od dana izvršenog redovnog nadzora.

Član 16.

(Zajednički inspeksijski nadzor)

- (1) Inspeksijski nadzor u pravnim licima iz stava 3. ovog pravilnika zajednički mogu da obavljaju federalni i kantonalni inspektor svako iz okvira svoje nadležnosti.
- (2) Inspeksijski nadzor iz stava (1) ovog člana obavlja se u slučajevima utvrđenim u članu 10. ovog pravilnika.

Član 17.

(Upoznavanje o ciljevima, sadržaju i metodu rada u inspeksijskom nadzoru)

- (1) Prije otpočinjanja obavljanja inspeksijskog nadzora federalni, odnosno kantonalni inspektor je dužan rukovodiocu pravnog lica gdje se obavlja inspeksijski nadzor predstaviti se i pokazati iskaznicu inspektora i tog rukovodioca upoznati o cilju, sadržaju, metodu rada i pitanjima koja će biti obuhvaćena inspeksijskim nadzorom, a onda zatražiti da rukovodilac odredi službeno lice koje će prisustvovati obavljanju inspeksijskog pregleda.
- (2) Nakon upoznavanja o pitanjima iz stava (1) ovog člana i određivanja lica koja će prisustvovati inspeksijskom pregledu, inspekcija pristupa obavljanju planiranog inspeksijskog nadzora.

Član 18.

(Osiguranje uvjeta za nesmetano obavljanje inspeksijskog nadzora)

- (1) Pravno lice iz člana 3. ovog pravilnika dužno je federalnom, odnosno kantonalnom inspektor osigurati sve potrebne uvjete za nesmetano obavljanje inspeksijskog nadzora, kao i dokumentaciju, spise te pregled objekata, prostorija, uređaja, opreme, instalacija i dr. što je predmet inspeksijskog nadzora.
- (2) Ukoliko pravno lice ne osigura uvjete iz stava (1) ovog člana, u tom slučaju inspektor obavještava policiju o nemogućnosti izvršenja inspeksijskog nadzora.

Član 19.

(Sačinjavanje zapisnika o izvršenom inspeksijskom nadzoru)

- (1) Nakon završenog inspeksijskog pregleda, federalni, odnosno kantonalni inspektori su dužni sastaviti zapisnik o izvršenom inspeksijskom nadzoru. Zapisnik sadrži pitanja koja su Zakonom o upravnom postupku predviđena za

zapisnik, s tim da se u zapisnik obavezno unose i sljedeći podaci:

- 1) naziv pravnog lica iz člana 3. ovog pravilnika, mjesto i adresa u kojem je obavljen inspekcijski nadzor;
 - 2) datum obavljanja inspekcijskog nadzora;
 - 3) podaci o odgovornom licu u pravnom licu (ime i prezime, datum rođenja, mjesto i država rođenja, JMB), a ako je odgovorno lice stranac, u tom slučaju treba i broj pasoša, mjesto prebivališta i boravišta;
 - 4) vrsta nadzora;
 - 5) naziv općeg akta, elaborata, plana zaštite, spisa, dokumentacije, uređaja opreme, instalacija i dr. pravnog lica u kome je izvršen inspekcijski pregled, uz navođenje broja, datuma i subjekta od kojeg je izdat dokument;
 - 6) zaključak sa kratkom konstatacijom o stanju mjera zaštite od požara u skladu sa Zakonom i propisima donesenim na osnovu tog zakona i utvrđenim normativima i standardima od zaštite od požara;
 - 7) da li će se obaviti ponovni/kontrolni inspekcijski nadzor, sadržaj pitanja koji podliježu ponovnom pregledu i vrijeme obavljanja tog pregleda;
 - 8) da li će se donositi rješenje o naređivanju otklanjanja utvrđenih nepravilnosti, zahtjev za pokretanje prekršajnog postupka, odnosno krivična prijava za pokretanje krivičnog postupka;
 - 9) pouka da se protiv zapisnika ne mogu koristiti pravni lijekovi.
- (2) Zapisnik potpisuje inspektor koji je izvršio inspekcijski pregled i lice iz člana 17. ovoga pravilnika koje je prisustvovalo inspekcijskom pregledu.

Član 20.

(Upoznavanje rukovodioca o izvršenom inspekcijskom nadzoru)

Nakon završenog inspekcijskog pregleda federalni i kantonalni inspektor usmeno upoznaje rukovodioca pravnog lica iz člana 3. ovog pravilnika o nađenom stanju i uručuje mu primjerak zapisnika o izvršenom inspekcijskom nadzoru.

Član 21.

(Rješenje o otklanjanju utvrđene nepravilnosti)

- (1) Rješenje kojim se naređuje otklanjanje utvrđenih nepravilnosti izrađuje se prema Zakonu o upravnom postupku, a zahtjev za pokretanje prekršajnog postupka sastavlja se prema odgovarajućim odredbama Zakona o prekršajima Federacije Bosne i Hercegovine ("Službene novine Federacije BiH", broj 31/06), koje se odnose na sadržaj tog zahtjeva, dok se krivična prijava sastavlja prema odgovarajućim odredbama Zakona o krivičnom postupku Federacije Bosne i Hercegovine ("Službene novine Federacije BiH", br.: 35/03, 37/03, 56/03, 28/05, 55/06, 27/07, 53/07, 9/09, 12/10 i 8/13) koje se odnose na krivičnu prijavu.
- (2) Rješenjem iz stava (1) ovog člana inspektori mogu narediti da se preduzmu mjere i radnje utvrđene u članu 152. Zakona.

Član 22.

(Prekršajni postupak i krivična prijava)

- (1) Izdavanje prekršajnog naloga, zahtjeva za pokretanje prekršajnog postupka, odnosno krivična prijava za krivično djelo podnosi se u sljedećim slučajevima i to:
 - 1) prekršajni nalog izdaje se ako se utvrdi da je učinjen prekršaj iz odredaba čl. 166. do 169. Zakona;
 - 2) zahtjev za pokretanje prekršajnog postupka podnosi se onda kada se utvrdi da je učinjen prekršaj iz odredaba čl. 166. do 169. Zakona;

- 3) krivična prijava se podnosi onda kada se utvrdi da postoje osnovi sumnje da je izvršeno određeno krivično djelo predviđeno Krivičnim zakonom Federacije Bosne i Hercegovine ("Službene novine Federacije BiH", br.: 36/03, 37/03, 21/04, 18/05, 42/10 i 42/11).
- (2) Zahtjev za pokretanje prekršajnog postupka podnosi se nadležnom općinskom sudu, a krivična prijava se podnosi nadležnom tužiteljstvu ili kantonalnom ministarstvu unutrašnjih poslova.
- (3) Izdavanje prekršajnog naloga vrši federalni, odnosno kantonalni inspektor u skladu s odredbom čl. 33. do 37. Zakona o prekršajima Federacije Bosne i Hercegovine ("Službene novine Federacije BiH", broj 31/06).

Član 23.

(Sačinjavanje izvještaja)

- (1) Federalni, odnosno kantonalni inspektor svaka tri mjeseca sastavlja izvještaj o ukupnom stanju i problemima u oblasti zaštite od požara koji je u tom tromjesečju izvršen prema programu inspekcijskog nadzora. Taj izvještaj sadrži sljedeće podatke i to:
 - 1) nazive pravnog lica iz člana 3. ovog pravilnika u kojima je obavljen inspekcijski nadzor i vrijeme obavljanja tog nadzora;
 - 2) naziv dokumentacije i spisa, instalacija, uređaja i druga pitanja koja su obuhvaćena inspekcijskim nadzorom i njihove usklađenosti sa Zakonom i propisima donesenim na osnovu tog zakona te tehničkim normativima i standardima;
 - 3) poseban osvrt na pitanja koja nisu riješena ili su nepravilno ili pogrešno riješena;
 - 4) prijedlog mjera i aktivnosti koje bi trebalo poduzeti radi otklanjanja utvrđenih nedostataka i nepravilnosti i rok u kojem bi trebalo obaviti te mjere i aktivnosti.
- (2) Federalni inspektor izvještaj dostavlja federalnom ministru unutrašnjih poslova, a kantonalni inspektor kantonalnom ministru unutrašnjih poslova.
- (3) Izvještaj iz stava (1) ovog člana dostavlja se i Federalnom ministarstvu energije, rudarstva i industrije ako je u toku izvještajnog perioda izvršen inspekcijski nadzor u pravnim licima koja su registrovana za proizvodnju sredstava naoružanja i vojne opreme.
- (4) Izvještaj iz stava (3) ovog člana sadrži samo pravna lica koja su registrovana za proizvodnju sredstava naoružanja i vojne opreme.
- (5) Federalno ministarstvo energije, rudarstva i industrije je dužno u roku od 60 dana od dana dostavljanja izvještaja iz stava (3) ovog člana obavijestiti federalnog, odnosno kantonalnog inspektora o mjerama koje su preduzete prema izvještaju.

Član 24.

(Dostavljanje izvještaja)

- (1) Federalni, odnosno kantonalni inspektor priprema godišnji izvještaj o obavljenim inspekcijskim pregledima tokom godine i nađenom stanju i problemima utvrđenim u oblasti zaštite od požara i drugim pitanjima koja su bila predmet inspekcijskog nadzora.
- (2) Izvještaj iz stava (1) ovog člana izrađuje se prema odredbama člana 23. ovog pravilnika.
- (3) Izvještaj federalne inspekcije iz stava (1) ovog člana za stanje u Federaciji podnosi se Vladi Federacije Bosne i Hercegovine, a izvještaj kantonalne inspekcije podnosi se vladi kantona putem federalnog, odnosno kantonalnog ministra unutrašnjih poslova.

**IV - PROPISI KOJI SLUŽE ZA OBAVLJANJE
INSPEKCIJSKOG NADZORA**

Član 25.

(Propisi po kojima se postupa u toku obavljanja inspeksijskog nadzora)

Federalni i kantonalni inspektori su dužni u obavljanju inspeksijskog nadzora u svim pitanjima iz svoje nadležnosti koja je utvrđena u članu 6. ovog pravilnika postupati u skladu sa Zakonom i svim podzakonskim propisima koji se donose na osnovu tog zakona.

**V - PRIPREME INSPEKTORA ZA OBAVLJANJE
INSPEKCIJE I STRUČNO OSPOSOBLJAVANJE
INSPEKTORA ZA OBAVLJANJE INSPEKCIJSKOG
NADZORA**

Član 26.

(Priprema za inspeksijski nadzor)

- (1) Svaki federalni i kantonalni inspektor je dužan redovno obavljati pripreme za izvršenje inspeksijskog nadzora.
- (2) Pripreme obuhvataju upoznavanje sa planom inspeksijskog nadzora, pitanjima koja su predmet inspeksijskog nadzora i načinom obavljanja nadzora, te proučavanje propisa i tehničkih normativa i standarda koji se odnose na pitanja koja su predmet inspeksijskog nadzora.

Član 27.

(Stručno osposobljavanje inspektora)

- (1) Radi stručnog osposobljavanja inspektora za jedinstvenu i pravilnu primjenu propisa u oblasti zaštite od požara, Federalno ministarstvo najmanje dva puta godišnje organizuje seminare i druge oblike stručnog osposobljavanja za sve inspektore iz kantonalnih ministarstava.

- (2) Obuka i stručno osposobljavanje inspektora iz stava (2) ovog člana vrše se po planu i programu obuke koji donosi federalni ministar unutrašnjih poslova. Obuka se odnosi na sva pitanja iz člana 6. ovog pravilnika.
- (3) Stručnoj obuci iz stava (1) ovog člana dužni su prisustvovati svi federalni i kantonalni inspektori za koje su organizovane obuka i stručno osposobljavanje.

**VI - SADRŽAJ I NAČIN VOĐENJA EVIDENCIJE O
OBAVLJENIM INSPEKCIJSKIM PREGLEDIMA**

Član 28.

(Evidencija o inspeksijskom nadzoru)

- (1) Federalni i kantonalni inspektori dužni su voditi evidenciju o obavljenim inspeksijskim pregledima.
- (2) Evidencija iz stava (1) ovog člana vodi se u knjizi evidencije o izvršenim inspeksijskim pregledima, koja se izrađuje prema obrascu knjige koji se nalazi u prilogu ovog pravilnika i čini njegov sastavni dio. Obrazac knjige se sastoji od dva dijela, prvi dio čini naziv evidencije, a drugi sadržaj te evidencije.
- (3) Knjiga evidencije iz stava 2. ovog člana vodi se na formatu A-3.
- (4) Knjigu evidencije inspeksijskog nadzora vodi svaki inspektor posebno za inspeksijski nadzor koji on obavlja.

VII - ZAVRŠNA ODREDBA

Član 29.

(Stupanje na snagu Pravilnika)

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-03-02-2-251/13

5. maja 2014. godine
Sarajevo

Ministar
Predrag Kurteš, s. r.

Sadržaj knjige evidencije o obavljenim inspekcijskim nadzorima

BOSNA I HERCEGOVINA
FEDERACIJA BOSNE I HERCEGOVINE

(naziv inspekcijskog organa)

KNJIGA EVIDENCIJE O OBAVLJENIM INSPEKCIJSKIM NADZORIMA IZ OBLASTI ZAŠTITE OD POŽARA

Godina:

Ime i prezime inspektora/inspektorice
